

NEWSLETTER



...jer nam je stalo!

januar 2026

mart 2026

POSMATRANJE PONOVIH PRIJEVREMENIH IZBORA ZA PREDsjedNIKA REPUBLIKE SRPSKE



Koalicija "Pod lupom" je za Ponovne prijevremene izbore za predsjednika Republike Srpske iz reda srpskog naroda koji su održani 08.02.2026. godine na 136 biračkih mjesta u 17 izbornih jedinica, angažovala 111 građanskih, nestranačkih posmatrača izbornog dana koji su posmatrali cjelokupni izborni proces.

Preliminarna ocjena izbornog dana Koalicije „Pod lupom“ za Ponovne prijevremene izbore ukazuje da je izborni proces, posmatrano isključivo u okviru metodologije direktnog posmatranja na biračkim mjestima, u najvećoj mjeri protekao u skladu sa važećim zakonskim pravilima i propisanim procedurama. Ipak, zabilježena su određena odstupanja na pojedinim biračkim mjestima koja, u izolovanim slučajevima, mogu imati uticaj na rezultate glasanja na nivou tih biračkih mjesta. Dodatno, pristup posmatrača na ovim izborima bio je otežan odlukama CIK BiH, kao i na terenu zbog proizvoljnih tumačenja procedura i pravila od strane izborne administracije. To je korak unazad u dostignutim demokratskim standardima i izbornoj praksi.

Istovremeno, ukupna slika izbornog dana ne može se posmatrati isključivo kroz nalaze sa biračkih mjesta. Tokom izbornog dana evidentiran je značajan broj indicija o izbornim nepravilnostima koje se odnose na dešavanja van obuhvata neposrednog posmatranja na biračkim mjestima, uključujući pritiske na birače oko biračkih mjesta, vođenje paralelnih evidencija o izlasku birača na izbore, indicije o jednostranački formiranim biračkim odborima uz navode o politički povezanim predsjednicima biračkih odbora kao i o mogućoj kupovini glasova. Obim i učestalost navedenih slučajeva kreiraju opravdanu sumnju u punu regularnost izbornog dana. U takvom kontekstu, i pored formalnog poštivanja procedura na većini biračkih mjesta, ne može se u potpunosti isključiti uticaj nepravilnosti na izbornu volju birača.

Preliminarna ocjena izbornog dana potvrđuje:

- da se na izborni dan moraju primijeniti izborne tehnologije u vidu elektronske identifikacije birača i skenera glasačkih listića na svim biračkim mjestima, a što će onemogućiti dokazane izborne nepravilnosti koje su i razlog ponavljanja ovih izbora;
- da policija i tužilaštvo moraju hitno procesuirati sve oblike nezakonitih pritisaka na birače, kako bi izborni rezultati odražavali stvarnu izbornu volju građana;
- da izborna administracija mora biti oslobođena od bilo kakvih političkih uticaja, u skladu sa zakonom;
- da provedba nezavisnog posmatranja izbora mora biti ohrabrena od strane institucija, a pristup posmatrača biračkim mjestima olakšan.

Skeniraj kod i pročitaj više o nalazima posmatranja izbornog dana!



POSMATRANJE PRIJEVREMENIH IZBORA ZA NAČELNIKA/ICU OPĆINE VAREŠ



Prijevremeni izbori za načelnika/icu Općine Vareš

**IZBORNI DAN U VAREŠU
PROTEKAO VEĆINSKI U
SKLADU SA IZBORNIM
PRAVILIMA**

Prijevremeni izbori za
načelnika/icu Općine Vareš
15.2.2026.

43%

izlaznost građana/ki do 19:00h



Koalicija „Pod lupom“ provela je građansku, nestranačku posmatračku misiju za Prijevremene izbore za načelnika/icu Općine Vareš koji su se održali u nedjelju, 15. februara 2026. godine.

Na dan izbora, Koalicija „Pod lupom“ rasporedila je posmatrače/ice izbornog dana (STO-e) na svih 20 biračkih mjesta u Općini Vareš koji su direktno i neprekidno posmatrali cjelokupan izborni proces, uz formirani jednog mobilni tim koji je obilazio biračka mjesta.

Posmatračice/ice izbornog dana pratili su sve faze izbornog procesa, uključujući uređenje i otvaranje biračkih mjesta, proces glasanja, zatvaranje biračkih mjesta, brojanje glasova, pakovanje izbornog materijala i proglašavanje rezultata izbora.

Koalicija „Pod lupom“ pratila je i izlaznost birača tokom izbornog dana, pružajući nezavisne podatke o odzivu birača u Općini Vareš. Podaci o izlaznosti objavljeni su u tri vremenska presjeka: u 11:00h, 15:00h i 19:00h.

U večernjim satima na izborni dan, po zatvaranju biračkih mjesta i nakon prikupljanja podataka sa terena, Koalicija „Pod lupom“ je objavila i preliminarne rezultate izbora za načelnika/icu Općine Vareš.

Skeniraj kod i pročitaj više o nalazima posmatranja izbornog dana!



JAVNA KAMPANJA ZA BOLJE IZBORE & PRVI PUT BIRAM



Koalicija „Pod lupom“ nastavila je realizaciju svojih kontinuiranih aktivnosti u okviru javne kampanje koja se provodi širom Bosne i Hercegovine. U prethodnom periodu fokus je stavljen na organizaciju **Akademija za fer izbore**, namijenjenih široj javnosti i svim građanima i građankama koji žele znati više o izbornom procesu, kao i na radionice „**Prvi put biram**“, koje su prvenstveno usmjerene na mlade i one koji će prvi put ostvariti svoje biračko pravo.

Kroz ove edukativne aktivnosti Koalicija „Pod lupom“ nastoji povećati nivo informisanosti građana o izborima, podstaći njihovo aktivnije učešće u izbornom procesu i dodatno doprinijeti jačanju demokratske kulture u zajednicama širom Bosne i Hercegovine.

JAVNA KAMPANJA U BROJKAMA

9448 građana/ki direktno uključeno u aktivnosti javne kampanje

3571 polaznika/ica edukativnih radionica Prvi put biram

1341 certificirana polaznika/ice Akademije za fer izbore

288 radionica Prvi put biram

108 akademija za fer izbore

PODCAST "IZBORNI KOMPAS"



Koalicija „Pod lupom“ objavila je novu epizodu informativno-edukativnog podcasta „**Izborni kompas**“, u kojoj se govori o jednom od najčešće spominjanih segmenata izbornog procesa, Centralnom biračkom spisku Bosne i Hercegovine (CBS-u).

U razgovoru koji vodi Hasan Kamenjaković, gost epizode je projekt menadžer Koalicije „Pod lupom“, Dario Jovanović koji detaljno objašnjava šta je CBS, ko ga vodi, koliko je ažuran i da li je zaista javan, te objašnjava izborne nepravilnosti koje se vezuju za njega.

Nova epizoda podcasta „Izborni kompas“ donosi detaljna objašnjenja, konkretne primjere i jasne preporuke za jačanje integriteta CBS-a i cjelokupnog izbornog procesa u Bosni i Hercegovini.



Skeniraj za epizode
na YouTube kanalu!



Skeniraj za epizode
na Spotify-ju!

STUDENTI JOHNS HOPKINSA I UNIVERZITETA U BOLOGNI U POSJETI KOALICIJI „POD LUPOM“



Koalicija „Pod lupom“ ugostila je u Sarajevu grupu studenata sa Johns Hopkins SAIS Europe i Univerziteta u Bologni, u okviru godišnje studijske posjete koju organizuje Centar za ustavne studije i demokratski razvoj (CCSDD).

Tokom posjete održan je radni sastanak i prezentacija rada Koalicije „Pod lupom“, s ciljem upoznavanja studenata s lokalnim perspektivama demokratskog razvoja, izbornog procesa i jačanja vladavine prava u Bosni i Hercegovini.

Studijska posjeta dio je šireg programa koji studentima omogućava da iz prve ruke steknu uvid u ustavni razvoj zemlje, poslijeratnu obnovu i ulogu civilnog društva u demokratskim procesima.

PODRŠKA UREDA VISOKOG PREDSTAVNIKA U BIH SLOBODNIM I POŠTENIM IZBORIMA



Visoki predstavnik u BiH Christian Schmidt razgovarao je sa Darijem Jovanovićem, projekt menadžerom Koalicije „Pod lupom“, o provedbi slobodnih i poštenih ponovljenih prijevremenih izbora u Republici Srpskoj.

Tokom sastanka, naglašena je važnost transparentnog i zakonitog izbornog procesa, uloge građanskih posmatrača i značaja volontera koji će pratiti izbore na terenu. Istaknuto je da izbori moraju biti organizovani u interesu građana, da politički akteri trebaju doprinijeti fer i konstruktivnoj izbornoj atmosferi, te da svaki pokušaj manipulacije ili zloupotrebe bude adekvatno sankcionisan, kako bi se očuvao integritet izbora i povjerenje birača.

ODRŽAN DVODNEVNI AFTER ACTIVITY REVIEW SA ORGANIZACIJAMA ČLANICA KOALICIJE "POD LUPOM"



Koalicija „Pod lupom“ održala je **dvodnevni After Activity Review**, posvećen refleksiji i evaluaciji aktivnosti u okviru posmatranja izbora i provođenja javne kampanje za bolje izbore. AAR-u su prisustvovala organizacije članice Koalicije "Pod lupom", a tokom dvodnevnog rada razmijenjena su iskustva, identifikovani izazovi i definisane preporuke za uspješnu realizaciju aktivnosti u budućnosti.

...jer nam je stalo!

